

Ex Libris



PROFESSOR J. S. WILL



Library
of the
University of Toronto

Digitized by the Internet Archive
in 2011 with funding from
University of Toronto



LA MANIERE
DE
BIEN TRADUIRE

D'VNE LANGVE EN AVTRE.

D'ADVANTAGE

De la Punctuation de la Langue Francoyse,

PLUS

Des Accents d'ycelle.

AVTHEVR

ESTIENNE DOLET,
Natif d'Orleans.

LYON,

ESTIENNE DOLET.

1540

CENT VINGT EXEMPLAIRES.


PARIS.

Imprimerie de I. Tastu.

SE VEND CHEZ TECHENER, LIBRAIRE,
Place du Louvre, n. 12.

Au Lecteur.

Ly et puis iuge : ne iuge toutesfoys deuant que d'auoir veu mon Orateur Francoys qui (possible est) te satisfera, quant aux doubtes, ou tu pourras encourir lisant ce liure.





ESTIENNE DOLET,

A MON SEIGNEUR DE LANGEI,

Humble salut et recongnissance de sa liberalité enuers luy.

Le n'ignore pas (seigneur par gloire immortel) que plusieurs ne s'esbaissent grandement de veoir sortir de moy ce present Oeuure : attendu que par le passé i'ay faict et fais encores maintenant profession totale de la langue Latine. Mais à cecy ie donne deux raisons : l'une, que mon affection est telle enuers l'honneur de mon païs que ie veux trouuer tout moyen de l'illustrer. Et ne le puis myeulx faire que de celebrer sa langue, comme ont faict Grecs et Rommains la leur. L'autre raison est, que non sans exemple de plusieurs ie m'addonne à ceste exercitation. Quant aux antiques tant Grecs que Latins, ilz n'ont prins aultre instrument de leur

eloquence que la langue maternelle. De la Grecque seront pour tesmoins Demosthene, Aristote, Platon, Isocrate, Thucydide, Herodote, Homere. Et des Latins ie produis Ciceron, Cæsar, Salluste, Virgile, Ouide, lesquelz n'ont delaisé leur langue pour estre renommez en vne autre. Et ont mesprisé toute autre sinon qu'aucuns des Latins ont apris la Grecque afin de scauoir les arts et disciplines traictées par les auteurs d'icelle. Quant aux modernes, semblable chose que moy a faict Leonard Aretin, Sannazare, Petrarque, Bembe (ceulx cy Italiens), et en France Budée, Bouille, et maistre Iacques Syluius. Doncques non sans l'exemple de plusieurs excellents personnages i'entreprends ce labeur. Lequel, Seigneur plein de bon iugement, tu recepuras non comme parfait en la demonstration de nostre langue, mais seulement comme vng commencement d'ycelle. Car ie scay que quand on voulut reduire la langue Grecque et Latine en art, cela ne fut absolu par vn homme, mais par plusieurs. Ce qui se fera pareillement en la langue Francoyse, et peu à peu par le moyen et travail des gens doctes elle pourra estre reduicte en telle perfection que les langues dessusdictes. A ceste cause,

Seigneur tout humain, ie te requiers de prendre ce mien labeur en gré : et s'il ne reforme totalement nostre langue, pour le moins pense que c'est commencement qui pourra paruenir à fin telle, que les estrangiers ne nous appelleront plus Barbares. Te soubuienne aussy en cest endroict, qu'il est bien difficile qu'une chose soit inuentée, et parfaicte tout à vn coup. Parquoy tu te doibs contenter de mon inuention, et en attendre ou par moy, ou par autres, la perfection avec le temps. Ioinct aussy qu'en choses grandes et difficiles le vouloir doibt estre assez. Je laisse ce propos, et te veulx dire ce qui m'a esmeu de te dedier ce liure. Certes l'opinion et estime grande que i'ay de ton scauoir, eloquence et iugement en tout esmerueillable, m'a induict à en faire autant ou plus que l'humanité, et liberalité, de laquelle tu vses de iour en iour, de plus en plus en mon endroict : et ce sans aucun mien merite; car de te faire aucun seruice, meritant telle amour que me la portes et monstres par effect, cela est hors totalement de mon pouuoir. Toutesfoys pour suppliment du pouuoir la volonté te doibt satisfaire : laquelle est telle que, sans exception d'aucun humain, ie te reuere comme

vn demi-dieu habitant en ces lieux terrestres, et estincellant de tous costez par vne lumiere de vertus à toy seul octroyées par l'Omnipotent : Omnipotent enuers toy prodigue de ses graces, si iamais il en eslargist à aucune sienne creature. Et qui est celuy qui puisse, à mon dict, contredire s'il a congnoissance de tes faicts ? Nul ne doubte de la bonté de ta nature. Chascun se sent de ta munificence. Toutes nations estranges ne preferent aucun à toy touchant l'art militaire et conduite de guerre. Quant à la politique et gouuernement equitable d'un païs, le Piedmont en donnera tesmoignage : en laquelle prouince tu es à present gouuerneur soubz l'autorité du Roy, qui t'a esleu à ceste charge, comme personne idoine à tous faictz de grand conseil et prudence. Croy (seigneur le premier des humains) que ie suis l'homme le moins admirant les hommes sans raison, et cause vehemente : mais tes vertus et perfections infinies m'ont rauy iusques à la que sur tous ie t'adore : et ceste affection, la posterité l'ignorera si mes oeuvres meritent immortalité de nom. Icy feray fin de mon epistre, te priant de rechef auoir ce mien liure pour agreable. De Lyon ce dernier iour de may mil cinq cents quarante.



ESTIENNE DOLET

Au Peuple Francoys,

Humble salut et accroissement d'honneur et puyssance.

DEPUIS six ans (ô peuple François) desrobant quelques heures de mon estude principale (qui est en la lecture de la langue Latine et Grecque), te voulant aussy illustrer par tous moyens, i'ay composé en nostre langage vn oeuvre intitulé *l'Orateur Francoys*, duquel oeuvre les traictez sont telz :

La Grammaire,
L'Ortographe,
Les Accentz,
La Punctuation,

La Pronunciation,
L'Origine d'aucunes Dictions,
La Maniere de bien traduire d'une
langue en aultre,
L'Art Oratoire,
L'Art Poetique.

Mais pour ce que le dict OEuure est de grand importance, et qu'il y eschet vn grand labeur, scauoir et extresme iugement, i'en differeray la publication (pour ne le precipiter) iusques à deux ou troys ans. Ce pendant tu t'ayderas des instructions qui sont en ce present liure. Lequel, si ie congnois t'estre agreable, ie seray plus enclin à te bien polir, et parfaire le demeurant de mon entreprinse. Combien que i'en attends plus tost contentement de la posterité que du siecle present; car le cours des choses humaines est tel, que la vertu du viuant est tousiours enuieée et deprimée par detracteurs, qui se pensent aduantager en reputation, s'ils mesprisent les labeurs d'autrui. Mais l'homme de scauoir et de bon iugement ne doit regarder à telz resueurs, et plus tost s'en mocquer du tout. Ainsi faisant, ie poursuiuray mon effort, et

attendray legitime los de la posterité : non d'aucuns viuantz par trop pleins d'ingratitude et mauuais vouloir. Contente toy pour ceste heure (ô peuple Francoys) de ce petit oeuvre : et prens pour pleige l'affection que ie porte à ma renommée, que dedans quelque temps ie te rendray parfait l'oeuvre dessusdict. Et si aucuns se delectent en tel labeur, cela n'est que bon. Que pleust à Dieu, que pour vn il y en eust mille : car par telz efforts le plus parfait sera congneu, et en demeurera la gloire au bien entendant la langue Latine et Francoyse. Pour le moins, de mon costé, ie tascheray de faire mon debuoir en si noble et louable passe temps. Vray est que si i'estois enuieux du bien d'autrui, ie me deporterois de ce mien labeur : pour ce que i'ay congneu telle ingratitude entre les hommes de mon temps, que ceux qui ont le plus prouffité sur mes oeuvres sont les premiers qui taschent de deprimer mon renom : mais pour leur meschante nature, ie ne laisseray de produyre par oeuvres le don de grace que le Createur m'a faict tant en la congnoissance de la langue Latine que de ma maternelle Francoyse. Et ce tout à l'honneur et gloire de luy (luy seul autheur de tout bien) et à l'utilité

de la chose publique, laquelle ie prefere aux maldicts de tous mes enuieux et detracteurs, qui à la fin se trouueront trompez en moy, car leur meschant langage ne me sert que d'un esguillon à la vertu : tout au rebours de ce qu'ilz voudroient de moy proceder. Mais ie scay, comme il fault tromper telles bestes chaussées, et en telle prudence consumeray le demeurant de ma vie, taschant tousiours de perpetuer mon nom par oeuvres recommandables à la posterité et aage futur : lequel se trouuant vuyde d'enuie en mon endroict, et muni de bon vouloir, ne se monstrera ingrat; mais, par une equité et raison, louera ce qui est de louer. Ceste esperance m'a tousiours esmeu à escrire, et donné cueur de prendre les labeurs que i'ay iusques icy prins en la vacation litteraire. Car, au iugement des viuants, il y a bien peu d'equité et racueil pour les doctes. Adieu, peuple le plus triumpphant du monde, soit en vertu, soit en puissance. A Lyon, ce dernier iour de may, l'an de grace mil cinq cents quarante.



LA MANIERE
DE BIEN TRADUIRE

D'VNE LANGVE EN AVTRE.

LA maniere de bien traduire d'une langue en autre, requiert principalement cinq choses. En premier lieu, il fault que le traducteur entende parfaitement le sens et matiere de l'auteur qu'il traduit; car par ceste intelligence il ne sera iamais obscur en sa traduction : et si l'auteur lequel il traduit est aucunement scabreux, il le pourra rendre facile et du tout intelligible. Et de ce ie te vois bailler exemple familierement. Dedans le premier liure des questions Tusculanes de Ciceron, il y a vn tel passage latin : « Animum autem animam » etiam fere nostri declarant nominari : nam et agere

» animam, et efflare dicimus : et animosos, et bene
» animatos : et ex animi sententia. Ipse autem animus
» ab anima dictus est. »

Traduisant cest oeuvre de Cicéron, i'ay parlé comme il s'ensuyt. « Quant à la difference (dy ie) de ces dictionns *animus* et *anima*, il ne s'y fault point arrester : car les facons de parler Latines, qui sont deduictes de ces deux mots, nous donnent à entendre qu'ilz signifient presque vne mesme chose. Et est certain que *animus* est dict de *anima*, et que *anima* est l'organe de *animus*, comme si tu voulois dire la vertu, et instrumens vitaulx estre origine de l'esperit : et icelluy esperit estre vn effect de ladicte vertu vitale. Dy moy, toy qui entends Latin, estoit il possible de bien traduire ce passage sans vne grande intelligence de Cicéron ? Or saiche donques qu'il est besoing et necessaire à tout traducteur d'entendre parfaitement le sens de l'auteur, qu'il tourne d'une langue en autre. Et sans cela, il ne peut traduire seurement et fidelement.

La seconde chose qui est requise en traduction, c'est que le traducteur ait parfaite congnoissance de la langue de l'auteur qu'il traduit : et soit pareille-

ment excellent en la langue en laquelle il se met à traduire. Par ainsi il ne violera, et n'amoindrira la maiesté de l'une et l'autre langue. Cuydes tu que si vn homme n'est parfaict en la langue Latine et Francoyse, qu'il puisse bien traduire en Francoys quelque oraison de Cicéron? Entends que chascune langue a ses propriétés, translations en diction, locutions, subtilités et vehemens à elle particulieres. Les quelles, si le traducteur ignore, il faict tort à l'auteur qu'il traduit, et aussy à la langue en la quelle il le tourne; car il ne represente et n'exprime la dignité et richesse de ces deux langues, des quelles il prend le maniement.

Le tiers poinct est qu'en traduisant il ne se fault pas asseoir iusques à la que l'on rende mot pour mot. Et si aucun le faict, cela luy procede de pauvreté et deffault d'esprit. Car, s'il a les qualitez dessusdictes (les quelles il est besoing estre en vn bon traducteur), sans auoir esgard à l'ordre des mots, il s'arrestera aux sentences, et fera en sorte que l'intention de l'auteur sera exprimée, gardant curieusement la propriété de l'une et l'autre langue. Et par ainsi, c'est superstition trop grande (diray ie besterie

ou ignorance ?) de commencer sa traduction au commencement de la clausule. Mais si, l'ordre des mots perueriti, tu exprimes l'intention de celui que tu traduis, aucun ne t'en peult reprendre. Je ne veux taire icy la follie d'aucuns traducteurs, lesquels, au lieu de liberté, se submettent à seruitude. C'est asscauoir qu'ils sont si sotz, qu'ilz s'efforcent de rendre ligne pour ligne ou vers pour vers, par laquelle erreur ilz deprauent souuent le sens de l'auteur qu'ilz traduisent, et n'expriment la grace et perfection de l'une et l'autre langue. Tu te garderas diligemment de ce vice, qui ne demonstre autre chose que l'ignorance du traducteur.

La quatriesme reigle que ie veulx bailler en cest endroit, est plus à obseruer en langues non reduictes en art, qu'en autres. L'appelle langues non reduictes encores en art certain et repceu : comme est la Francoyse, l'Italienne, l'Hespaignole, celle d'Allemagne, d'Angleterre, et autres vulgaires. S'il aduient doncques que tu traduisés quelque liure Latin en icelles, mesmement en la Francoyse, il te fault garder d'vsurper mots trop approchans du Latin, et peu vsitez par le passé : mais contente toy du commun, sans innouer

aucunes dictions follement, et par curiosité reprehensible. Ce que si aucuns font, ne les ensuy en cela : car leur arrogance ne vault rien, et n'est tollerable entre les gens scauans. Pour cela n'entends pas que ie die que le traducteur s'abstienne totalement de mots qui sont hors de l'vsaige commun : car on scait bien que la langue Grecque ou Latine est trop plus riche en dictions, que la Francoyse qui nous contrainct souuent d'vser de mots peu frequentés. Mais cela se doit faire à l'extresme necessité. Je scay bien en oultre qu'aucuns pourroient dire que la plus part des dictions de la langue Francoyse est deriuée de la Latine, et que noz predecesseurs ont heu l'autorité de les mettre en vsaige, les modernes et posterieures en peuuent autant faire. Tout cela se peult debattre entre babillarts : mais le meilleur est de suyure le commun langage. En mon Orateur Francoys ie traicteray ce poinct plus amplement, et avec plus grand' demonstration.

Venons maintenant à la cinquiesme reigle que doit observer vn bon traducteur. La quelle est de si grand' vertu, que sans elle toute composition est lourde et mal plaisante. Mais qu'est ce qu'elle contient? rien autre chose que l'observation des nombres oratoires :

c'est asscauoir vne liaison et assement des dictiones avec telle douceur, que non seulement l'ame s'en contente, mais aussi les oreilles en sont toutes rauies, et ne se faschent iamais d'une telle harmonie de langage : d'yceulx nombres oratoires ie parle plus copieusement en mon orateur : par quoy n'en feray icy plus long discours. Et de rechef aduertiray le traducteur d'y prendre garde : car sans l'observation des nombres, on ne peult estre esmerueillable en quelque composition que ce soit : et sans yceulx les sentences ne peuvent estre graues et auoir leur poids requis et legitime. Car penses tu que ce soit assés d'auoir la diction propre et elegante sans vne bonne copulation des mots? Ie t'aduse que c'est autant que d'un monceau de diuerses pierres precieuses mal ordonnées : lesquelles ne peuvent auoir leur lustre, à cause d'une collocation impertinente. Ou c'est aultant que de diuers instruments musicaux mal conduicts par les ioueurs ignorantz de l'art peu congnoissantz les tons et mesures de la musique. En somme, c'est peu de la splendeur des motz, si l'ordre et collocation d'yceulx n'est telle qu'il appartient. En cela sur tous fut iadis estimé Isocrate, orateur grec : et pareillement Demos-

tene. Entre les latins, Marc Tulle Cicéron a esté grand obseruateur des nombres. Mais ne pense pas que cela se doibue plus obseruer par les orateurs que par les historiographes. Et qu'ainsi soit, tu ne trouueras Cæsar et Salluste moins nombreux que Cicéron. Conclusion quant à ce propos, sans grande obseruation des nombres vn autheur n'est rien : et avec yceulx il ne peult faillir à auoir bruict en eloquence, si pareillement il est propre en diction, et graue en sentences : et en arguments subtil. Qui sont les poincts d'un orateur parfaict, et vrayment comblé de toute gloire d'eloquence.

FIN.






LA PUNCTVATION

DE

LA LANGVE FRANCOYSE.

 toutes les langues generally ont leurs differences en parler et escripture, toutes-foys non obstant cela elles n'ont qu'une punctuation seulement : et ne trouueras qu'en ycelle les Grecs, Latins, Francoys, Italiens ou Hespaignolz soient differents. Doncques ie t'instruiray briefuement en cecy. Et pour t'y bien endoctriner il est besoing de deux choses. L'une est que tu congnoisses les noms et figures des points : l'autre que tu entendes les lieux ou il les fault mettre.

Quand aux figures elles sont telles qu'il s'ensuit , ou en ceste sorte :

1.	,	4.	?
2.	:	5.	!
3.	.	6.	()

1. Le premier poinct est appellé en latin *incisum* : et en Francoys (principalement en l'imprimerie) on l'appelle vn point à queue, ou virgule : et se souloit marquer ainsi /.

2. Le second est appellé en grec Comma : et les Latins luy ont baillé autre nom. Mais il fault entendre que toutes ces sortes de punctuer n'ont leur appellation et nom à cause de leur forme, et marque, ains pour leur effect et propriété.

3. Le tiers est dict par les Grecs Colon. En latin on l'appelle *punctum* : et en l'imprimerie on l'appelle vn poinct, ou vn poinct rond. Toutesfoys quant à l'efficace il n'y a pas grand' difference entre Colon et Comma. Si non que l'vn (qui est Comma) tient le sens en partie suspens : et l'autre (qui est le Colon) conclud la sentence. Par ainsi on pourroit dire que le Colon peult comprendre plusieurs Comma, et non pas le Comma plusieurs Colon.

Si en cest endroit quelque maling detracteur veult

dire que i'entends mal ce que les Grecs appellent Comma et Colon : ie luy responds que combien que les Grecs ayent appellé Comma ce que i'appelle poinct à queue, et que dudict Comma ie marque vng Colon : et que ie constitue vng Colon pour fin de sentence, certainement ie n'erre en rien. Car les Latins interpretent Comma par *incisum* : et si les Grecs le prennent pour incision de locution, ie le veulx prendre pour incision de sentence, c'est asscauoir pour sentence moyenne et suspendue : et le Colon pour sentence finale du periode. Ie dy cecy pour obuier aux maldisants et calumniateurs. Desquelz il est au temps present si grand nombre, que si vng homme d'esprit s'arrestoit à eulx, il ne composeroit iamais rien. Mais mon naturel est tel que ie n'ay aultre passetemps que de telz folz.

4. Le quart est nommé par les Latins *interrogans*, et par les Francoys Interrogant.

5. Le quint differe peu du quart en figure : toutesfoys il se peult appeller Admiratif, et non Interrogant.

6. Le sixiesme est appellé parenthese : et est double, comme lon peult voir par ses deux petits demys cercles.

Or puisque tu congnois leurs noms et figures, ie te veulx maintenant monstrier familierement quelz lieux ils doibuent anoir en nostre parler et escripture : et te prie y vouloir entendre : car la punctuation bien gardée et obseruée sert d'une exposition en tout oeuvre.

Premierement il te fault entendre que tout argument et discours de propos, soit oratoire ou poetique, est deduit par periodes.

Periode est une diction Grecque que les Latins appellent *clausula*, ou *comprehensio verborum* : c'est à dire une Clausulé, ou une Comprehension de parolles. Ce Periode (ou autrement Clausule) est distingué, et diuisé par les poincts dessus dictz. Et communement ne doit auoir que deux ou trois membres : car si par sa longueur il excède l'haleine de l'homme il est vitiieux. Si tu en veulx auoir exemple, ie te voys forger vng propos ou il y aura troys periodes : dedans lesquelles tous les poincts que ie t'ay proposez seront contenus, et puis ie te declareray par le menu l'ordre et la cause d'vng chascun. Or mon propos sera tel.

L'Empereur congnoissant que paix valloit mieulx que guerre, a faict appointement avec le roi : et pour

plus confirmer ceste amitié, allant en Flandre il a passé (chose non esperée) par le royaulme de France, ou il a esté repceu en grand honneur, et extresme ioye du peuple. Car qui ne se reiouyroit d'vng tel accord? Qui ne loueroit Dieu de veoir guerre assopie, et paix regner entre les chrestiens? O que longtemps auons désiré ce bien! o que bien heureux soient qui ont traicté cest accord! que maudicts soient qui tascheront de le rompre!

Au premier Periode (qui commence l'Empereur congnoissant) ie te veux monstrier l'vsage du Poinct à queue, du Comma, de la Parenthese et du Poinct final, aultrement dict Poinct rond. Le Poinct à queue ne sert d'aultre chose que de distinguer les dictions et locutions l'vne de l'autre. Et ce ou en adiectifs, substantifs, verbes ou aduerbes simples. Ou avec adiectifs ioincts aux substantifs expressement. Ou avec adiectifs gouuernans vng substantif. Ou avec verbes regissans cas, ce que nous appellons locutions. Exemple de l'adiectif simple. Il est bon, beau, aduenant, ieune et riche. Ne vois-tu pas que ce Poinct distingue ces dictions bon, beau, aduenant, ieune et riche? Exemple du substantif simple. Il est plein de grand'

bonté, beaulté, adresse, ieunesse et richesse. Exemple du verbe simple. Il ne fault rien que manger, boire et dormir. Exemple de l'aduerbe. Il a faict cela prudemment, courageusement et heureusement. Exemple de l'adiectif ioint au substantif. Il est de grand courage, de prudence singuliere et execution extresme. Exemple de l'adiectif gouuernaut vng substantif. Il a tousiours vescu bien seruant Dieu, secourant ses prochains et n'offensant personne. Exemple du verbe regissant cas. C'est chose louable de bien seruir Dieu, secourir ses prochains et n'offenser personne.

Voila des exemples pour te montrer clairement l'vsage de ce point à queue. Il a pareillement tel vsage en la langue Latine. Deuant que de venir aux aultres poincts, ie te veulx aduertir que le point à queue se met deuant ce mot ou, semblablement deuant ce mot Et. Exemple de ce mot Ou. Sot, *Ou* sage qu'il soit, il me plaict. Exemple de ce mot Et. Sans scauoir, *et* bonne vie l'homme n'est point à priser. Or, entends maintenant que ce mot Ou, aussi ce mot Et, sont aucunes fois doublés : et lors au premier membre il n'y eschet aucun point à queue. Exemple de Ou. Soit *Ou* par mer, *Ou* par terre, le roy est le

plus puissant. Exemple de Et. Il a tousiours esté constant *et* en bonne fortune, *et* en mauuaise.

Je viens maintenant à parler du Comma : lequel se met en sentence suspendue, et non du tout finie. Et aulcunesfois il n'y en a qu'un en vne sentence : aulcunesfois deux, ou trois. Exemple. Il est bon de n'offenser personne : car il n'est nul petit ennemy : et chascun tasche de se venger, quand il est offensé.

Quant à la Parenthese, c'est vne interposition qui a son sens parfait : et pour son interuention ou destraction, elle ne rend la Clausule plus parfaite ou imparfaite. Exemple. Allant en Flandre il a passé (chose non esperée) par le royaume de France. Oste la Parenthese, le sens sera aussy parfait que sy elle y estoit. Ce qui est facile à congnoistre. Entends aussy que la Parenthese peult auoir lieu partout le discours du periode : sinon au commencement et à la fin. D'aduantage il est à noter que deuant, ou apres la parenthese il n'y eschet aucun point à queue ou final. Et dedens y en eschet aussi peu : si ce n'est vn interrogant ou vn admiratif. Exemple du premier. Si ie puy iamais auoir puissance, ie me vengeray d'un si vilain tour (en doibs ie faire moins?) et luy

donneray à entendre qu'il me souuient d'une iniure dix ans apres qu'elle m'est faicte. Exemple du second. Estant le plus fort en toutes choses il fut vaincu (quel hazard de guerre!) et tost apres fut victeur seulement par prudence.

Sans aucune vigneur de Parenthese on trouue quelquesfois vn demy cercle en ceste sorte) ou ainsi], et cela se faict quand nous exposons quelque mot, ou quant nous glosons quelque sentence d'aucun auteur Grec, Latin, Francoys ou de toute autre laugue.

On trouue aussi ces demys cercles aucunesfois doublés : et ce sans force de Parenthese. Ils se doublent doncq' ainsi [] ou 6 9. Et lors en iceulx est comprinse quelque addition, ou exposition notée sur la matiere, que traicte l'auteur par nous interpreté. Mais le tout (comme i'ay dict) se faict sans efficace de Parenthese. Lisant les bons auteurs, et bien imprimés, tu pourras congnoistre ma traditiue estre vraye.

Quant au Poinct final aultrement dict Poinct rond, il se met tousiours à la fin de la sentence, et iamais n'est en aultre lieu. Et apres luy on commence volontiers par vne grande lettre.

Au demeurant : il n'y a que deux poincts : c'est

l'interrogant et admiratif : et l'un et l'autre est final en sens : et en peult auoir plusieurs en vne periode. L'interrogant se faict par interrogation pleine adressée à vn ou plusieurs tacitement. Exemple : Qui ne se res-iouiroit d'un tel accord ? Qui ne loueroit Dieu de voir guerre assopie et paix regner entre les chrestiens ?

L'admiratif n'a si grand' vehemence : et eschet en admiration procedante de ioye ou detestation de vice et meschanceté faicte. Il conuient aussi en expression de soubhait et desir. Brief : il peult estre partout où il y a interiection. Exemple. O que longtemps auons desiré ce bien ! O que bien heureux soient qui ont traicté cet accord ! Que mauldicts soient qui tascheront de le rompre ! A tant te suffira de ce que i'ay dict des figures et collocation de la punctuation. Je scay bien que plusieurs Grammariens latins en ont baillé d'auantage : mais tu ne te doibs amuser à leurs resueries. Et si tu entends et obserues bien les reigles precedentes, tu ne fauldras à doctement punctuer.

THE [illegible] OF [illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]

[illegible]



LES ACCENTS

DE

LA LANGVE FRANCOYSE.

LES gens doctes ont de coustume de faire servir les accents en deux sortes. L'une est en prononciation et expression de voix, expression dicte Quantité de voyelle. L'autre en imposition de marque sur quelque diction. Du premier vsage nous ne parlerons icy aulcunement : car il n'en est point de besoin. Et d'aduantage il a moins de lieu en la langue Francoyse qu'en toutes aultres : veu que ses mesures sont fondées sur syllabes et non sur voyelles : ce qui est tout au rebours en la langue Grecque et Latine.

Quant à l'imposition de marque (qui est le second membre de l'accent), i'en diray en ce Traicté ce

qu'il en fault dire brièvement et priuement, sans aucune ostentation de scauoir et sans fricassée de Grec et Latin. L'appelle fricassée vne mixtion superflue de ces deux langues, qui se faict par sottetelets glorieux et non par gens resolués et pleins de bon iugement. Venons à la matiere.

En la langue Francoyse sur toutes lettres, il y en a deux qui recoiuent plus accent que les aultres. C'est asscauoir *a* et *e*. De ces deux nous parlerons par ordre.

La lettre dicte *a* se trouue en troys sortes communement en nostre langue francoyse. Aulcunes foyz elle est vn article du datif, car le datif Latin est exposé en Francoys par ledict article. Exemple : Dedi Petro, quod ad me scripseras : J'ay baillé à Pierre ce que tu m'auois escript.

Aulcunes foyz est proposition seruant à l'accusatif cas, et vault autant comme *ad* en latin. Exemple : Rex ad imperatorem scripsit, tutam ei viam in Flandriam per Galliam patere : Le Roy a escript à l'Empereur que le passage luy estoit seur par France pour aller en Flandre.

Aulcunes foyz aussi ceste particule *a* signifie autant

en Francoys que *habet* en latin. Exemple : *Habet omnia quæ in oratore perfecto esse possunt* : Il a toutes choses qui peuuent estre en vn orateur parfaict. Autre exemple : *Occidit illum nefarie* : Il l'a tué meschamment. Telle est la langue Francoyse en aulcunes locutions, ou pour vn mot Latin il y en a deux Francoys, comme : *Respondit*, il a respondu : *Cantauit*, il a chanté : *Scipsit*, il a escript : *Fuit*, il a esté. En ces locutions, ce mot *a* est prins diuersement, car il est de signification possessiue, actiue ou temporelle. Exemple de la possessiue : *Multas diuitias habet*, il a plusieurs richesses. Exemple de l'actiue : *Cantauit*, il a chanté. Exemple de la temporelle : *Fuit*, il a esté. Quant à la duplication des mots pour vn seul Latin, cela se faict seulement en la signification actiue et temporelle de ceste diction *a*. Exemple : *Cantarunt*, ilz ont chanté : *Fuerunt*, ilz ont esté. Et par cela tu peux congnoistre que la langue Latine comprend plus que la Francoyse : ce qu'il n'aduient pas en toutes choses.

Note doncques que, quand *a* est article ou preposition, il le fault signer d'un accent graue en ceste sorte, *à*. Et ainsi signent les Latins leurs prepositions,

c'est ascauoir à et è. Mais quand *a* represente ce verbe Latin *habet*, il n'a point d'accent. Lors aulcuns l'escruiuent avec vne aspiration *ha*, ce qui me semble superflu : toutesfoys ie remects cela à la fantasie d'un chacun. Note aussi que, quand il est de signification actiue ou temporelle (comme i'ay demonsté), il ne recoipt point d'accent.

La lettre appelée *e* a double son et prolation en Francoys : la premiere est dicte masculine et l'autre feminine. La masculine est nommée ainsi, pour ce que *é*, masculin, a le son plus viril, plus robuste et plus fort sonnante. Dauantage il porte sur soy vne virgule vn peu inclinée à main dextre, comme est l'accent appelé des Latins aigu, ainsi *é*. Exemple : Il est homme de grand' bonté, priuauté et familiarité; plus, il dist tousiours verité. Autre exemple : Apres qu'il eut bien mangé, banqueté et chanté, il voulut estre emporté de là, et puis fut couché en vng bon liet : mais le lendemain matin, apres estre desyuré, il se trouua bien estonné, et fut frotté et gallé de mesmes par vng tas de rustres qui ne l'aymoient gueres. Voilà deux exemples de la termination masculine.

Maintenant il te fault noter diligemment deux choses. C'est que ceste lettre *é* estant masculine, iamaïs ne vient en collision; c'est à dire qu'estant deuant vng mot commençant par voyelle, elle ne se perd point. Exemple : Il a esté homme de bien toute sa vie, et n'a merité vn tel outrage.

En apres, il fault entendre que ceste lettre *é* est aussi bien masculine au plurier nombre qu'au singulier, et ce tant en noms qu'en verbes. Exemple des noms : Les iniquités et meschancetés, desquelles il estoit remply, l'ont conduit à ce malheur. Autre exemple : Toutes voluptés contraires à vertu ne sont louables.

Ie te veulx auertir en cest endroict d'une mienne opinion : Qui est que le *é*, masculin en noms de plurier nombre, ne doit recepuoir vn *z*, mais vne *s*, et doit estre marqué de son accent tout ainsi qu'au singulier nombre. Tu escriras donq' voluptés, dignités, iniquités, verités; et non pas voluptéz, dignitéz, iniquitéz, veritéz; ou sans *e* marqué avec son accent aigu, tu n'escripras voluptez, dignitez, iniquitez, veritez.

Car *z* est le signe de *é*, masculin au plurier nom-

bre des verbes de seconde personne, et ce sans aucun accent marqué dessus. Exemple : Si vous aymez vertu, i'amaïs vous ne vous addonnerez à vice, et vous esbattez tousiours à quelque exercice honneste. Autre exemple : Si vous estiez telz que vous dictes, vous ne deschasseriez ainsi les vertueux. Sur ce propos, ie scay bien que plusieurs non bien congnoissants la virilité du son de le *é*, masculin, trouueront estrange que ie repudie le *z* en ces motz voluptés, dignités et autres semblables. Mais, s'ilz le trouuent estrange, il leur procedera d'ignorance et mauuaise coustume d'escripre, la quelle il conuient reformer peu à peu.

Oultre ce qui est dict, saiche que *e*, de prononciation masculine, ne se met seulement en fin de diction, mais aussi deuant la fin. Exemple : Iournée, renommée, meslée, assemblée, diffamée, affolée, et autres motz qui se forment du masculin et féminin : comme est de despitée, despitée : de courroucé, courroucée : de suborné, subornée, et semblables dictions tant au singulier nombre qu'au pluriel. Exemple du pluriel : Contrées, iournées, assemblées, menées.

L'autre prononciation de ceste lettre *e* est féminine, c'est à dire de peu de son et sans vehemence.

Estant feminine elle ne recoipt aucun accent. Exemple : Elle est notable femme de bonne vie, de bonne rencontre, et autant prudente et sage que femme qui se trouue en ceste contrée.

Note aussi que, quand ceste lettre *e* est feminine, elle est de si peu de force que tousiours elle est mangée, s'il s'ensuict apres elle vng mot commençant par voyelle. De là ont leur origine les figures appellées Synalephe et Apostrophe : entre lesquelles figures il y a aulcune difference, comme nous demonstrerons maintenant.

La figure que nous appellons Synalephe ou collision, oste et menge la voyelle en proferant seulement et non en escripuant, car ladicte voyelle se doit escrire. Exemple en prose : I'ay esperance en luy, et me fie en la grande amour et largesse extresme, de laquelle il vse enuers tous gens scauants. En cest exemple, la derniere lettre d'esperance, *ie*, grande, largesse, laquelle, *vse*, se perd en proferant, à cause des aultres mots ensuinants qui commencent pareillement par voyelle. Mais non obstant la collision, il fault escrire tout au long tant en prose qu'en vers.

Exemple en rythme.

Tu es tant belle et de grâce tant bonne,
Qu'à te servir tout gentil cueur s'addonne.

Necessairement en ce mot *belle*, le dernier *e* est mangé, ou autrement le vers seroit trop long. Et les Faictistes, qui composent rythmes en langage vulgaire, appellent cela coupe feminine, c'est à dire abolition de l'*e* feminin, qui rencontre vne aultre voyelle, par laquelle il est aboli apres la quatriesme syllabe du vers. De cecy ie parleray plus amplement en l'art poétique.

Ce dict *e* feminin est aucunes foys autrement mangé par apostrophe. Or l'apostrophe oste du tout la voyelle finale de ce qui precede la voyelle du mot ensuyuant, et faict qu'elle ne s'escript, ne profere aucunement, et suffist que seulement on la marque en dessus par son petit point. Deuant que de t'en bailler exemple, ie t'aduertis qu'apostrophe eschet principalement sur ces monosyllabes, ce, se, si, te, me, que, ne, ie, re, le, la, de. Et combien que les Francoys n'ayent de coustume de signer ledict apostrophe, si en vsent ilz

naturellement : principalement aux monosyllabes dessusdicts, quand le mot ensuyuant se commence semblablement par voyelle.

Et si d'aduanture il se commence par *h*, cela n'empesche point quelquefois l'apostrophe; car nous disons et escripuons sans vice, l'honneur, l'homme, l'humilité; et non le honneur, le homme, la humilité. Au contraire, nous disons sans apostrophe le haren, la harendiere, la haulteur, le houzeau, la housse, la hacquebute, le hacquebutier, la haquenée, le hazard, le hallecret, la hallebarde. Et si ces mots se proferent sans grande aspiration, la faulte est anorme. De la quelle faulte sont pleins les Auvergnats, les Prouencaulx, les Gascons, et toutes les prouinces de la Langue d'Oc : car pour le haren, ilz disent l'aren : pour la harendiere, l'arendiere : pour la haulteur, l'aulteur : pour le houzeau, l'ouzeau : pour la housse, l'ousse : pour la honte, l'onte : pour la hacquebute, l'acquebute : pour la hacquenée, l'acquenée : pour le hazard, l'azard : pour le hallecret, l'allecret : pour la hallebarde, l'allebarde. Et non seulement (qui pis est) font ceste faulte au singulier nombre de telles dictions, mais aussi au plurier. Car pour des harens,

ilz disent des arens : pour les hacquenées, les acque-
nées : pour mes houzeaux, mes ouzeaux : pour il me
fault, ou ie me vois houzer, il me fault ouser. Or,
ie laisse le vice de ces nations et reuiens à ma ma-
tiere.

Exemple de *ce* : C'est grand follie de prendre pied
à ces paroles. Sans apostrophe, il faudroit dire : Ce
est grand follie. Entends toutesfoys que souuent ce
mot *c'est* n'a point d'apostrophe, comme quand nous
parlons ainsi : Cest oeuvre est digne de louenge : Cest
homme n'est pas en son bon sens : Cest Allemand est
trop glorieux.

Exemple de *se* : S'aduenturant de passer la riuere
à pied, il s'est noyé : pour se aduenturant, et pour il
se est noyé. Note icy que non seulement cette diction
se recoipt apostrophe, mais aussi ces mots la recoip-
uent, c'est ascauoir, son, mon, ton. Et par cela nous
disons : M'amy pour mon amy, et m'amour pour
mon amour, et t'amour pour ton amour, et s'amour
pour son amour. Et vsons de tel parler tant en prose
qu'en rhytme, mais plus souuent en rhytme. Et
aussi m'amy et m'amour sont dictions plus vsitées
que les deux autres.

Exemple de *si* : S'il estoit possible, ie voudrois bien faire cela. Pour si il estoit possible : Toutesfoys tu ne verras gueres qu'il recoipue apostrophe avec autre mot que ce mot *il*. Exemple de toutes autres voyelles. De la voyelle *a* : Si audace estoit prisée, chascun seroit audacieux. De la voyelle *e* : Si eloquence est en luy grande, ce n'est de merueille; car il a vn esperit merueilleux, et puis il estudie continuellement en Cicéron. De la voyelle *i* : Si ignorance vient à regner, tout est perdu. De la voyelle *o* : Si orgueil est en vn homme, ie ne le puis frequenter.

De la voyelle *u* : Si vn homme diligent peult paruenir à richesses, i'espere quelque iour estre riche. En tous ces exemples, ie confesse que l'apostrophe y peult escheoir : mais avec apostrophe le parler sera plus rude que sans apostrophe : ce que peult facilement iuger vn homme d'oreilles delicates, i'excepte tousiours les licences poetiques et les laisse en leur entier. Car vn poete pourra dire (à cause de sa rythme) s'audace, s'eloquence, s'ignorance, s'orgueil s'vn homme.

D'aduantage il te conuient scauoir que ceste particule *si* est aulcunes foys conditionnale ou demonstra-

tiue; et lors elle peult recepuoir apostrophe, comme tu as veu aux exemples precedents. Aulcunes foyz elle se met pour tant ou tant fort; et lors elle ne repcoit aulcune apostrophe. Exemple : Il est si ambitieux, si enuieux, si iniurieux, si oultrageux, que personne ne le peult comporter. Autre exemple : Ce lieu est si vmbrageux que le fruict n'y peult meurir : c'est à dire, tant ambitieux, tant enuieux, tant iniurieux, tant oultrageux, tant vmbrageux. Alors garde toy de l'apostrophe, car il n'y auroit rien si aspre en prolation que dire s'ambitieux, s'enuieux, s'iniurieux, s'oultrageux, s'vmbrageux.

Tel est l'vsage de ceste particule *ni*, car elle ne recoipt pas bonnement apostrophe, si elle se rencontre deuant vn mot commençant par voyelle. Exemple : Je ne veis iamais ni Amboise, ni Enuers, ni Italie, ni Orleans, ni vmbrage en ce champ. En toutes ces locutions, l'apostrophe seroit indecente et lourde. Exemple de *te* : Je serois marri de t'auoir offensé; il t'eust bien recompensé si tu eusses faict cela; il t'interrogue; il t'oultrage; il t'vse ta robbe : pour de te auoir; il te est; il te interrogue; il te oultrage; il te vse.

Exemple de *me* : Il m'assault ; il m'entend bien ; il m'irrite ; il m'outrage ; il m'vse tous mes habillements : pour il me assault , il me entend bien , il me irrite , il me outrage , il me vse.

Exemple de *que* : C'est bonne chose qu'argent en nécessité ; Qu'est ce que richesse sans santé ? Il fault qu'il s'y trouue ; O qu'orgueil est desplaisant à Dieu ; Il n'est scauoir qu'vsage ne surmonte : pour que argent , que il se y trouue , que orgueil , que vsage.

Exemple de *ne* : Ie n'ay que ce vice ; Il n'est rien si sot ; Il n'ignore cela ; Cela n'orne point le parler ; Ie n'vse iamais de parfums : pour ie ne ay ; il ne est ; il ne ignore ; cela ne orne ; ie ue vse. Exemple de *ie* : l'ay tousiours peur des calumniateurs ; l'entends bien que tu demandes ; l'interpreteray ce liure de Ciceron ; Ie te donneray à entendre comme i'ouys cela de luy ; l'vse souuent de telles figures : pour ie ay , ie entends bien , ie interpreteray , ie ouys , ie vse. Exemple de *re* : Il faut r'assembler ces pieces ; Ie te r'ennoye ton seruiteur ; Il seroit bon de r'imprimer ses œuvres ; Il fault r'ouurir ce coffre ; Il seroit bon de r'vmbrager ce ply : pour reassembler , reenuoye , reimprimer , reouurir , reumbrager , et note que *re* signifie de rechef.

Exemple de *le* : L'auoir n'est rien en vn homme, s'il n'a vertu; L'entendement trop soubdain ne faict pas grand fruit; L'interpreteur de cecy ment; L'orgueil de luy me desplaist; L'vsage de tel art est faulx : pour le auoir, le entendement, le interpreteur, le orgueil, le vsage.

Exemple de *la* : L'amour est bonne quand elle est fondée en vertu; L'enfance de luy a esté terrible; L'interpretation de ce lieu est difficile; L'oultrecuidance est grande; L'vsance est telle : pour la amour, la enfance, la interpretation, la oultrecuidance, la vsance.

Exemple de ce mot *de* : C'est grand charge d'auoir tant d'enfants; Par faulte d'entendre le Grec, il a failli; Cela part d'inuention bien subtile; Ceste responce est pleine d'orgueil et oultrage; Par faulte d'vser de bon regime, il est retombé en fieure : pour de auoir, de entendre, de inuention, de orgueil, de vser.

Ie ne parleray plus de l'Apostrophe, et viendray maintenant à declarer que signifie vn petit Poinct semblable à celui de l'Apostrophe. Ce petit Poinct est signe d'une figure nommée des Grecs et Latins *apocope*, et ainsi la nomment aussi les Francoys par faulte

d'autre terme à eulx propre. Ceste figure oste la voyelle ou syllabe de la fin d'un mot pour la necessité du vers, ou affin que le mot soit plus rond et mieulx sonnant. Exemple : Pri', suppli', com', hom', quel', el', tel', recommand', encor', avec' : pour prie, supplie, comme, homme, quelle, elle, telle, recommande, encores, avecques. En prose, L'exemple peult estre grand' chose; Quelle qu'el' soit : pour grande chose; quelle qu'elle soit. Car ainsi la prolation est plus douce et plus ronde.

Au demeurant, il fault entendre que les Francoys vsent, oultre ce que dessus, de deux sortes de caracteres, lesquelz sont de telle figure :

A ..

Tous deux se signent sur voyelles, mais au reste ilz sont bien differentz. Le premier est signe de conjunction; le second de diuision. Le premier r'assemble, r'unit, et conioinct les parties diuisées, et ce en troys facons. La premiere, quand par vne figure fort vsitée nommée *syncope*, *concision* ou *couppure* (car ainsi se peult dire en Francoys), vn mot est

syncope, c'est à dire diuisé et diminué au milieu, puis les deux parties sont reioinctes ensemble, la diuision et reunion d'icelles est signifiée par ledict caractere. Exemple : Lai'rra, pai'ra, vrai'ment, hardi'ment, don'ra : pour laissera, paiera, vraiment, hardiement, donnera. Et ainsi font souuent les Latins, comme l'on veoit aux bonnes impressions, esquelles on treuve diu'um, du'um, vir'um : pour diuorum, duorum, virorum. La seconde facon de ceste figure est quand deulx mots (desquelz l'vn est detronqué) sont rassemblés en vn. Exemple : Au'ous, pour auez vous : qu'au'ous, pour qu'avez vous : m'au'ous, pour m'avez vous : n'au'ous, pour n'avez vous : n'auons, pour nous ne auons. Tel est le commun vsage de la langue Francoyse. La tierce facon de ceste figure est quand deux voyelles sont r'accoursies et proferées en vne : ce qui se faict souuent en rythme principalement.

Exemple : Pensées, ou les deux *é e* se passent pour vn proferé par traict de temps assés longuet, quasi comme si l'on disoit pensés. Et note que cecy est general en toutes dictions feminines, qui sont formées des dictions masculines, ausquelles la derniere voyelle est

masculine : et ce seulement au pluriel nombre. Et si tu signes ceste figure sur les deux *e'e*, il n'y fault point d'accent aigu sur le penultime *e*. Exemple : Courroucé, courroucée, courroucées : irrité, irritée, irritées : suborné, subornée, subornées. En telle sorte doit on escrire en rythme; mais en prose avec vn accent aigu sur le *e* penultime : ainsi courroucées, irritées, subornées. Par ceste figure aussi on dict aisément, nommément, a'age ou e'age, en faisant de deux syllabes vne par synerese et r'accourissement.

Le second caractere dessus mentionné, qui est .., noté sur les voyelles, est celuy par lequel on fait au contraire de l'autre duquel sortons de parler. Car il signifie diuision et separation, et que d'une syllabe en sont faictes deux. Exemple : Païs, poëte : pour pa'ïs, po'ete.

Ce sont les perceptions que tu garderas, quant aux accents de la langue Francoyse. Lesquelz aussi obserueront tous diligents imprimeurs : car telles choses enrichissent fort l'impression, et demonstrent que ne faisons rien par ignorance.

Quant à l'accent enclitique, il n'est point recep-

uable en la langue Francoyse, combien qu'aucuns soient d'autre opinion. Lesquelz disent qu'il eschet en ces dictions : Je , tu , vous , nous , on , lon. La forme de cest accent est telle ' : par ainsi ilz voudroient estre escript en la sorte qui ensuit. M'atendrai' ie à vous? feras' tu cela? quant aurons' nous paix? dict' on tel cas de moy? voirra' lon iamais ces meschantz punitz? De rechef, ie t'aduse que cela est superflu en la langue Francoyse et toutes autres; car telz pronoms demeurent en leur vigueur, encores qu'ilz soient postposés à leurs verbes. Et qui plus est, l'accent enclitique ne conuient qu'en dictions indeclinables, comme sont en Latin, Ne, ve, que, nam. Qu'ainsi soit, on n'escript point en Latin en ceste forme : « Feram' ego id iniuriæ? eris' tu semper tam nullius consilii? auersabimini' vos semper à vobis pauperes? » Tiens doncques pour seur que tel accent n'est propre aucunement à nostre langue : qui sera fin de ce petit Oeuure.







1920

